

Radiukkut tv-kkullu aallakaatitsisarneq pillugu Inatsisartut peqqussutaat

Kalaallit Nunaanni radiukkut fjernsynikkullu aallakaatitsisarneq pillugu inatsit nr. 815, 19. december 1989-imeersoq naapertorlugu aalajangersarneqarput:

Kapitali 1

Aallakaatitassiorsinnaatitaaneq

§ 1. Makkua § 2-mi taaneqartunik aallakaatitassiornissamut pisinnaatitaapput:

- 1) Kalaallit Nunaata Radioa (KNR), tak. kapitali 4.
- 2) Ingerlatseqatigiiffiit, peqatigiiffiit assigisaallu kiisalu kommunit aallakaatitsisinaanermut akuersisummik kapitali 3 malillugu tunineqarsimasut.

Imm. 2. Inatsisartut peqqussutaat aammalu Inatsisartut peqqussutaat naapertorlugu aalajangersakkat atuutilersinneqarsimasut kiisalu aallakaatitsisinaanermut akuersisummik tunineqarnermi piumasaqaatitit nalunaarutigineqarsimasinnaasut naapertorlugit aallakaatitassioqartassaaq.

§ 2. Aallakaatitassiorneq imatut paasineqassaaq:

- 1) Radioqarfiiit aqqutigalugit tusarnaagassianik isiginnaagassianillu inunnut tamanut aallakaatitsineq.
- 2) Tusarnaagassianik isiginnaagassianillu nr. 1-imi ilanngullugit taaneqanngitsunik antenneqarfiiit ataatsimoorussat iluaqutigalugit agguaanerit.

Imm. 2. Inatsisartut peqqussutaanni matumani radioqarfinnik oqarnermi pineqarput radiukkut attaveqarnermut atortut ledningeqanngitsut sulluunniit.

Imm. 3. Inatsisartut peqqussutaanni matumani antenneqarfinnik ataatsimoorussanik oqarnermi pineqarput antenneqarfiiit ataatsimoorussat kabeleqarfyllu allat aallakaatitassianik tusarnaagassianik isiginnaagassianillu ininut privatimik najugaqarfiusunut inunnut tamanut agguasarnermut atortut.

Imm. 4. Inatsisartut peqqussutaanni matumani kabeleqarfinnik oqarnermi pineqarput kabelit aqqutigalugit nalunaarasuartaatitigut attaveqatigiinnermut atortut.

§ 3. Nalunaarasuartaatitigut attaveqarneq sullissinerlu pillugit Inatsisartut peqqussutaat naapertorlugu tamanut ammasumik nalunaarasuartaatitigut sullissinermi atortorisanik ingerlatsinermillu kiisalu tamakku suliariumannittussarsiorsinnaanerit kisermaassisinnaanermik akuersisuteqartup, teknikkkut atortunik KNR-ip §2, imm. 1 naapertorlugu tusarnaagassianik isiginnaagassianillu inunnut tamanut aallakaatitsisarnermi pisariaqartitaanik, KNR-mik isumaqatigiissutit malillugit pilersissavai, atortunillu ingerlatsineq akisussaaffigissallugu.

Imm. 2. Atortunik imm. 1-imi taaneqartunik ikkussuinermit ingerlatsinernullu piumasaqaatit kiffartuussinermit isumaqatigiissutini aalajangersarneqassapput, Naalakkersuisunit akuerineqartussanngorlugit.

Imm. 3. Kiffartuussissutit imm. 1-imi taaneqartut akiisa naatsorsorneqarnissaannut tunngavissat akiliisarnissamullu piumasaqaatit Naalakkersuisut erseqqinnerusumik malittarisassiorssinnaavaat.

Kapitali 2

Tusarnaagassianik isiginnaagassianillu siammarterisarneq

TV-ikkut aallakaatitsissutaasinnaasut digitaliusut iluaqutigalugit tusarnaagassianik isiginnaagassianillu siammarterineq

§ 4. Kallaallinit aammalu nunanit allanit tusarnaagassianik isiginnaagassianillu aallakaatitsissutit digitaliusut iluaqutigalugit nuna tamakkerlugu siammarterineq, taamaallaat Naalakkersuisut akuersissuteqarnerisigut pisinnaavoq.

Imm. 2. Naalakkersuisut akuersissummik tunniussinerminnut atatillugu akuersissummut piumasaqaatinik aalajangersaasinnaapput.

Imm. 3. Kisermaassinermut akitsuutit Naalakkersuisunit aalajangerneqartut akilersinnissaannut akuersissuteqartinnissaat Naalakkersuisut piumasarisinnaavaat.

Imm. 4. Naalakkersuisut akuersissummik atorunnaarsitsisinnaapput akuersissummik piginnittup

1) Inatsisartut peqqussutaat imaluunniit aalajangersakkat peqqussut naapertorlugu aalajangersarneqarsimasut unioqqutippagit, unioqqutitsineq annertuppat unioqqutitsinerilluunniit qasseeriarluni akuttunngitsumik pippata, imaluunniit

2) akuersissuteqarnermi piumasaqaatigineqartut sumiginnarpagit.

Imm. 5. Kallaallinit aammalu nunanit allanit tusarnaagassianik isiginnaagassianillu aallakaatitsissutit digitaliusut iluaqutigalugit nuna tamakkerlugu siammarterinemut akuersissummik tunniussisarneq pillugu maleruagassianik Naalakkersuisut aalajangiisinnaapput.

Antenneqarfinni ataatsimoorussani tusarnaagassianik isiginnaagassianillu siammarterisarneq

§ 5. Kallaallinit aammalu nunanit allanit tusarnaagassianik isiginnaagassianillu, antenne iluatigalugu toqqaannartumik tigooqqarneqartunik, imaluunniit kabeleqarfiit aqutigalugit tigooqqarneqartunik, antenneqarfinni ataatsimoorussani agguasaarneq taamaallaat pissaaq allannguuteqanngitsumik aallakaatitsinerullu peqatigisaanik.

Imm. 2. Taamaattorli allagartalersuineq assigisaalu kiisalu piffissakkut allakkut agguaneq pisinnaapput radiukkut imaluunniit fjernsynikkut aallakaatitsivik atorneqartoq akuersisimappat.

§ 6. Antenneqarfinnik ataatsimoorussanik piginnittut pisussaapput, tusarnaagassiat isiginnaagassiallu radioqarfiit aqutigalugit KNR-imit siammarterneqartut siaruarternissaat qulakkiissallugu. Tamatumani pineqanngillat aallakaatitassiat § 29, imm. 1, naapertorlugu aallakaatinneqartut. Pisussaaffik aamma atuutinngilaq KNR-ip aallakaatitai antenneqarfinnik ataatsimoorussanik atuisunit allatut tigoorneqarsinnaappata.

Imm. 2. KNR-imit aallakaatitassiat digitaliusut taamaallaat siaruarterneqassapput aallakaatitassiat digitaliusut allat antenneqarfimmi siaruarterneqarpata. KNR-imit aallakaatitassiat digitaliusut allanngortinneqarnissaat inerteqqutaavoq, ilutigitillugu aallakaatitassiat assingi digitaliusumik siaruarterneqanngippata.

§ 7. Antenneqarfiit marlunnik amerlanerusunik kanaleqarpata aammattaaq kanali ataaseq atugassanngortinneqassaaq nunaqarfigisami aallakaatitassianut kapitali 3 malillugu akuersissut

naapertorlugu siammarneqartussanut agguanneqartussanulluunniit.

Imm. 2. Aallakaatitassiat ataatsimoortut neqeroorutigineqarpata,

1) ataatsimoortut tamarmik aallakaatitassianik imm. 1-imi aamma § 6-imi ilanngunneqartunik imaqaassapput, aammalu

2) ataatsimoortut ataasiinnaat, aallakaatitassianik imm. 1-imi aamma § 6-imi ilanngunneqartunik imaqartut imaluunniit aallakaatitassianik taakkuinnarnik aallakaatitassianillu allanik imaqartut pisiarinissaannut periarfissaqassaaq, taakkulu ima killilimmik akeqartillugit akilerneqassapput aallakaatitassiat ilassutaat, aallakaatitassiat ataatsimoortut katillugit akiinut killilimmik naleqassallutik.

Imm. 3. Imm. 2 naapertorlugu pisussaaffik atuutinngilaq aallakaatitassiat pineqartut antenneqarfinnik ataatsimoorussanik atuisunit allatut tigoorarneqarsinnaappata.

§ 8. Dekoderit aallakaatitanik ilisarnarunnaarsakkanik allannortitsilluni tv-kkut aallakaatitanik fjernsynikkut takuteqqeriaannangortitsissutit antennini ataatsimoorussani atorneqarsinnaanerit maleruagassanik Naalakkersuit aalajangiisinaapput. Maleruagassani pissutsit makkua pineqarsinnaapput:

1) Aallakaatitassianik neqerooruteqartut dekodeerit ataatsimoorussanik antenneqarfinni ataatsimoorussani atorneqartunik atuisinnaatitaanerit.

2) Aallakaatitassianik neqerooruteqartut namminerisamik dekodeeriminnik atuisinnaatitaanerit.

3) Aallakaatitassianik neqerooruteqartut atuisunut toqqaannartumik akiliisitsisinaanerit.

Kapitali 3

Aallakaatitsisinaanermut akuersissut

§ 9. Ingerlatseqatigiiffit, peqatigiiffit assigisaasaluunniit nuna tamakkerlugu aallakaatitassiornissamut qinnuteqarnerisa kingorna, Naalakkersuisut akuersissut tunniussinnaavaat (nuna tamakkerlugu aallakaatitsisinaanermut akuersissut) , tak. § 14.

Imm. 2. Naalakkersuisut nuna tamakkerlugu aallakaatitsisinaanermut akuersissuteqarnerminnut atatillugu akuersissummut, matumani aamma ilanngullugit piffissamik killiliinermut kisermaassinermullu akitsuutit akilernissaannut piumasaqaatinik aalajangiisinaapput.

Imm. 3. Nuna tamakkerlugu aallakaatitsisinaanermut akuersissummut piumasaqaatit atugassarititaasullu Naalakkersuisunit erseqqinnerusumik maleruagassiuunneqarsinnaapput, aallakaatitsisinaanermut akuersissummut akitsuutit akilernissaat ilanngullugit.

§ 10. Radio tv-lu pillugit aalajangiisartut, tak. kapitali 6, ingerlatseqatigiiffit, peqatigiiffit assigisaasalu kiisalu kommunit qinnuteqaateqarnerisigut nunaqarfigisami aallakaatitsisinaanermut akuersissuteqarfigisinaavai (nunaqarfigisami aallakaatitsisinaanermut akuersissut) tak. § 13.

Imm. 2. Nunaqarfigisap iluani aallakaatitsisinaanermut akuersissut kommunip pineqartup iluani aallakaatitsisinaanermut akuersissutaavoq. Pissutsit immikkut illuinnartut atuutsillugit kommunit qanigisat iluanni aamma aallakaatitsisinaaneq Radio tv-lu pillugit aalajangiisartut aallakaatitsisinnamut akuersissummik piginnittumut akuersissutigisinaavaa.

Imm. 3. Aallakaatitassiamik sumiiffimmi allami aallakaatitsisinaanermut akuersissummik piginnittumit tassunga ilutigitillugu aallakaatinneqartumik aallakaatitsinissaq taamaallaat ajornanngilaq aallakaatitsisinaanermut akuersissutinik piginnittut tamanna isumaqatigiissutigippassuk, aammalu aallakaatitassianik assigiinnik ataatsikkut aallakaatitsinerit ataasiakkaaginaappata.

Imm. 4. Radio tv-lu pillugit aalajangiisartut sumiiffimmi aallakaatitsisinaanermut

akuersissutaagallartumik tunniussinermigut aallakaatitsisinnaaneq akuersissutigisinnaavaa, aallakaatitassiat sumiiffiup iluani piffissap sivikitsup ingerlanerani pisunik ataasiakkaanik imaqarpata.

§ 11. Aallakaatitsisinnaanermut akuersissutip aallakaatitsisinnaanermut akuersissutaanermi saniatigut aammattaaq imaraa radiofrekvensit pillugit inatsisip Kalaallit Nunaanni atuutilersinneqarnera pillugu Kunngip peqqussutaa naapertorlugu frekvensimik atuinissamut akuersissut.

Imm. 2. Aallakaatitsisinnaanermut akuersissut piffissami, qaammatisiutit malillugit ukiup akuersissummik tunniussiffiusup sinnerani kiisalu qaammatisiutit malillugit ukiuni taassuma tulliini tallimani atuuttussatut tunniunneqassaaq, aatsaalli piffissamut sivikinnerusumut qinnuteqartoqarsimangippat. Piffissaq aallakaatitsisinnaanermut akuersissutip atuuffia naappat nutarterneqarnissaa qinnutigineqarsinnaavoq.

§ 12. Aallakaatitsisinnaanermut akuersissummik qinnuteqaammi aallakaatitassiat suunerat nassuiarneqassaaq. Aallakaatitassiariniakkap tamakkerlugu suunera nassuiaammi ersersinneqassaaq. Qinnuteqaat paasissutissanik makkuninnga imaqassaaq:

- 1) Qinnuteqaateqartup aqqa, najugaa, immaqalu oqarasuaatip telefaxillu normui kiisalu e-mail adresse.
- 2) Qinnuteqaateqartup IIN-normua aamma ingerlatsiveqarfittut normua.
- 3) Aallakaatitsisinnaanermut akuersissutip qanoq siaruarsinnaatiginera.
- 4) Sumiiffik aallakaatitat annguffigisinnaasaat.
- 5) Aallakaatitsisinnaanermut akuersissutip suussusia (radio tv-luunniit).
- 6) Piginnittunut, siulersugaanermut pisortaqaanermullu tunngasut.
- 7) Tusagassiutitut ingerlassanik allanik piginnittuusimagaanni suleqateqaraanniluunniit.
- 8) Suleqatigiinnissamik pilersaaruteqaraanni.
- 9) Aallakaatitassiornerup ilusia imarisaalu, aamma oqaatsit agguataagaanerat.
- 10) Piffissat aallakaatitsiffiit.
- 11) Aallakaatitassiornerup aningaasalersugaanera.
- 12) Aallakaatitsinermut aallakaatitassiornermullu atortorissaarutit.
- 13) Pissutsit, Radiofrekvensit pillugit inatsisip Kalaallit Nunaanni atuutilersinneqarnera pillugu peqqussut naapertorlugu frekvensimik atuinissamut akuersissummik qinnuteqaatip suliarineqarnissaanut pisariaqartut.

Imm. 2. Qinnuteqaat aallakaatitassiornermut akisussaasumit atsiorneqarsimassaaq.

Imm. 3. Qinnuteqaateqartup akuersissummik tunineqareernermi kingorna paasissutissanut imm. 1-imi taaneqartunut allannguutaasinnaasut Radio tv-lu pillugit ataatsimiititaliamut qaqugukkulluunniit nalunaarutigisassavai.

Imm. 4. Qinnuteqaateqarnermi periusissat pillugit maleruagassat aamma paasissutissanut ilassutissat Naalakkersuisut aalajangersinnaavaat.

§ 13. Ingerlatseqatigiiffiit, peqatigiiffiit assigisaasalu sumiiffiup aalajangersimasup iluani aallakaatitsisinnaanerannut akuersissut piumasaqaatit makkua naammassineqarsimappata tunniunneqassaaq:

- 1) Ingerlatseqatigiiffik, peqatigiiffik assigisaaluunniit Kalaallit Nunaanni angerlarsimaffeqassaaq.
- 2) Ingerlatseqatigiiffiup, peqatigiiffiup assigisaataluunniit qinnuteqaammi uppernarsaatissanut piumasaqaatit naammassisimassavai, tak. § 12, imm. 1.
- 3) Aallakaatitassiap ilusia imarisaalu inatsisinik unioqutitsisutut isigineqartuussanngillat.
- 4) Radiofrekvensit pillugit inatsisip Kalaallit Nunaanni atuutilersinneqarnera pillugu peqqussut naapertorlugu frekvensimik atuinissamut akuersissummik piumasaqaatit naammassineqarsimassapput.

Imm. 2. Kommunip aallakaatitsinnaaneranut akuersissut tunniunneqassaaq imm. 1-imi piumasaqaatit naammassineqarsimappata, aammalu kommunip aallakaatitassiornissamut siunertatuaa tassaappat innuttaasut soqutiginnittut aallakaatitassiornermut aallakaatitsinermullu atortorissaarutininik atugassaqartinnissaat imaluunniit kommunip paasisutissanik ingerlatitsisarnissaa.

§ 14. Ingerlatseqatigiiffiit, peqatigiiffiit assigisaasalu nuna tamakkerlugu aallakaatitsisinnaanerannut akuersissut tunniunneqarsinnaavoq piumasaqaatit imaattut naammassineqarsimappata:

- 1) § 13 , imm. 1-imi piumasaqaatit naammassineqarsimappata.
- 2) Qinnuteqaateqartoq sumiiffiup aalajangersimasup iluani tassunga ilutigitillugu aallakaatitsisinnaanermut akuersissummik tunineqarsimanngippat.
- 3) Qinnuteqaateqartup aningaasaqarniarnikkut tunngavia naammaginaruuppat.
- 4) Qinnuteqaateqartup aallakaatitsinissamut periarfissai naammaginaruuppat.

Imm. 2. Nuna tamakkerlugu aallakaatitsisinnaanermut akuersissummik kommunimut tunniussisoqarsinnaanngilaq.

§ 15. KNR-ip akuersissutillu piginnittuata aallakaatitsinerit tamarmik aallakaatitassiornermut akisussaasoqartinneqarnissaat isumagissavaat.

Imm. 2. KNR-ip akuersissutillu piginnittuata isumagissavaat aallakaatitassiat naammassineri tamaasa kia akisussaasimanerata nalunaarutigineqarnissaa, aammalu radioqarfup tv-qarflluunniit suunera paasisitsissutigineqassaaq.

Imm. 3. KNR-ip akuersissutillu piginnittuata ingerlatami aalajangersakkat eqqortinneqarnissaat nakkutigissavaat.

§ 16. KNR aamma akuersissutip piginnittua upalungaarsimanissami pingaaruteqartunik innuttaasunut nalunaarutininik aallakaatitaqartarnissamik pisussaapput.

Imm. 2. Imm. 1-imi aallakaatinneqartussat taaneqartut qaqugu qanorlu aallakaatinneqartarnissaat pillugu Naalakkersuisut malittarisassanik aalajangiisnaapput.

§ 17. KNR-ip akuersissutillu piginnittuata aallakaatitassiat tamaasa, maleruagassat Naalakkersuisunit aalajangerneqartut naapertorlugit immiuttassavaat qaammatinilu pingasuni toqqortarisassallugit. Aallakaatitassiorneq pillugu suliamik suliaqarnermut atatillugu, pilerisaarutit aallakaatinneqarsimasut ilanngullugit, Radio tv-lu pillugit aalajangiisartut piginnittoq peqqusinnaavaat aallakaatitassianik immiussat tunniuteqqullugit. Suliassap aallakaatitsinermut tunngasup suliarineqarnera pissutigalugu pisariaqarpat piginnittoq Radio tv-lu pillugit ataatsimiititaliamit peqquneqarsinnaavoq aallakaatitassiat qaammatinit pingasunit sivisunerusumik toqqortareqqullugit.

§ 18. KNR-ip aamma sumiiffinni radioqarfuit tv-qarfillu kapitali 5 naapertorlugu tapiissutininik pissarsisartut piginneqqaartussaataaneq pillugu inatsisip periarfissiinera naapertorlugu innuttaasunut periarfissiissapput aallakaatitassianik toqqortaasivimminni misissuisinnaatillugit, taamaaliornissamut aningaasartuutininik akiliuteqartitsillutik.

§ 19. Radio tv-lu pillugit aalajangiisartut sumiiffimmi aallakaatitsisinnaanermut akuersissut atuukkunnaarallartissinnaavaa atuukkunnaavitsissinnaalluguluunniit, akuersissutip piginnittuata § 13 naapertorlugu aallakaatitsisinnaanermut akuersissuteqarnissamut piumasaqaatit naammassisinnaajunnaarpagit, imaluunniit akuersissutini ukioq ataaseq sinnerlugu atorsimanngippagu.

Imm. 2. Radio tv-lu pillugit aalajangiisartut sumiiffimmi aallakaatitsisinnaanermut akuersissut atuukkunnaarallartissinnaavaa atuukkunnaavitsissinnaalluguluunniit, akuersissutip piginnittuata

- 1) paragraffit 15-imiit 18-imut, § 17 naapertorlugu peqqussutit nalunaarutigineqartut imaluunniit

aalajangersakkat taakku malillugit § 16, imm. 2-mi peqqussutigineqartut sumiginnarpagit,
2) § 12, imm. 3, unioqquippagu,
3) pilersaarisarnermut aningaasalersuinernullu maleruagassat unioqquippagit, tak. kapitali 7,
4) Inatsisartut peqqussutaat imaluunniit aalajangersakkat peqqussut naapertorlugu
aalajangersarneqarsimasut unioqquippagit, unioqquitsinerit annertuujuppata qasseeriarluniluunniit
unioqquitsineruppata,
5) inatsisit allat ingerlatsinermini annertuumik qasseeriarluniluunniit unioqquippagit, imaluunniit
6) Radiofrekvensit pillugit inatsisip Kalaallit Nunaanni atuutillersinneqarnera pillugu peqqussut
naapertorlugu pinngitsoorani akiliutaasussat akilersimangippagit.
Imm. 3. Imm. 2-mi taaneqartut pimatillugit Radio tv-lu pillugit aalajangiisartut inassuteqarneratigut nuna
tamakkerlugu aallakaatitsisnaanermut akuersissut Naalakkersuisut atorunnaarallartissinnaavaat
atorunnaavitsisnaalluguluunniit. Atorunnaarsitsineq pisinnaavoq akuersissutip piginnittuata
aallakaatitsisnaanermut akuersissummik tunineqarnissamut piumasaqaatit
naammassisinnaajunnaarpagit, tak. § 14-imi akuersissummut piumasaqaatit, imaluunniit ukioq ataaseq
sinnerlugu akuersissut atorneqarsimangippat.

Kapitali 4

KNR

Siunertat suliassallu

§ 20. KNR-ip siunertaraa Kalaallit Nunaanni innuttaasut tamakkerlugit aallakaatitassianik sullissinernillu
tamatigoortunik nutaarsiassaqartitsinerimut, qaammarsaanermut, ilinniartitsinerimut,
eqqumiitsuliornermut aliikkusersuinernullu tunngasunik (innuttaasunik kiffartuussinerimi pisussaaffit) tv,
radio aamma internet assigisaalluunniit aqutigalugit pilersorneqarnissaat qulakkiissallugu.

Imm. 2. Aallakaatitassiat suliarilluagaallutillu, tamatigoortuullutillu amerlasuujunissaat
anguniarneqassaaq.

Imm. 3. KNR-ip aallakaatitassiai ataatsimut isigalugit Kalaallit Nunaanni inuiaqatigiit tamatigoortumik
sammeneqarnerannik imaqaassapput, tassuunakkullu kulturikkut, inuunermik paasinnikkut inuunermilu
atugassarititaasutigit nunap immikkoortuini assigiinngitsuni atugaasut qanoq assigiinngitsiginerinek
takussutissiissallutik.

Imm. 4. Nunap tamavimmi sammeneqarnissaa anguniarlugu KNR aallakaatitassiorartullu allat, aamma
sumiiffinni radioqarfii tv-qarfilla niuernerpalaartumik tunngaveqarlutik erseqqinnerusunik
isumaqatigiissuteqassapput, taamaalillutik aallakaatitassiorartut allat sumiiffimminniit nuna
tamakkerlugu ingerlatsisumut ilaatigut pilersuisunngorlutik.

Imm. 5. Aallakaatitassiat innuttaasut inuiaqatigiinnut tunngasunik pingaarutilinnik
ilisimatinneqarnissaannik oqallinnissaanillu qulakkeerisuussapput.

Imm. 6. Aallakaatitassiatigit aammattaaq eqqumiitsuliornikkut kulturikkullu pilersitsisarnerup
tamatiguussusia takussutissaqartinneqassaaq, aallakaatitassianilu inuiaat kalaallit kulturikkut
soqutigisaasa amerlasuunut sammissusiat ersersinneqassalluni. KNR-ip kalaallit eqqumiitsuliaannik
kulturiannillu, aamma kalaallit kulturikkut kingornussaannik sulissutiginninniartutut
ingerlatitseqqinniartutullu inissisimanini pingaartilluinnassavaa.

Imm. 7. KNR-ip aallakaatitassiami aallakaatitanik meeqqanut inuusuttuaqqanullu sammitinneqartut
isumagissavai.

Imm. 8. KNR-ip teknikkikkut periarfissat nutaat atorlugit isumaginiassavaa inuit innarluutillit aallakaatitassianik atuisinnaanerannik annertusaanissaq, matumani aamma aallakaatitassiat inuiaqatigiinnut annertuumik soqutiginaatillit sapinngisamik allagartalersugaanissaat ussersornikkulluunniit nutserneqarnissaat anguniassallugu.

Imm. 9. KNR-ip innuttaasuni ikinnerussuteqarlutik kalaallit oqaasiinik ilitsoqqussaralugu oqaaseqartuunngitsut aallakaatitassiamini sapinngisamik annertunerpaamik isumagineqarnissaat qulakkiissavaa.

§ 21. KNR-ip aallakaatitassianik meeqqat ukiukinnerit timikkut, tarnikkut ileqqulersornikkulluunniit annertuumik ajoquserneqaatigisinnaasaannik, matumani pingaartumik aallakaatitassianik atoqatigiinnermut tunngasunik imaluunniit pissuteqanngivilluni nukissornermik imaqartunik aallakaatitsisoqannginnissaa qulakkiissavaa. Ilanngutassiat sakkortuumik nukissornermik imaqartut imaluunniit isiginnaagassat kanngunartut pillugit KNR-i tusarnaartartunut isiginnaartartunullu mianersoqqusisassaaq.

Imm. 2. KNR-ip aallakaatitassianik ammip qalipaataanik, arnaanermik/angutaanermik, upperisamik, sumit naggueqarnermik, nunamit suminngaanneerermik, politikkimik isummamik anguteqammilluunniit/arnaqammilluunniit atoqateqartartuunermik pissuteqartumik qinngarsuilernissamut aqutissiueqataasinnaasunik aallakaatitsisoqannginnissaa qulakkiissavaa.

§ 22. Aallakaatitassianik aaqqissuussinermi pingaartilluinnarneqassapput naqisimaneqanngitsumik paasissutissiisinnaatitaaneq oqaaseqarsinnaatitaanerlu.

Imm. 2. Innuttaasut KNR aqutigalugu paasissutissiisinnaanissamut periarfissinneqarnissaat KNR-ip qulakkiissavaa. Tassunga atatillugu KNR aningaasartuutitut akiliuteqartitsilluni tusarnaartartut isiginnaartartullu nammineerlutik aallakaatitassiaminnik ineriartortitsineranni ikiorneqarnissaannik aammalu tusarnaartartut isiginnaartartullu allatut KNR aqutigalugu saqqummiussisinnaanissaat neqeroorfigisinnaavai.

§ 23. Paasissutissiisarnermi tunngaveqarluartarnissaq nakerisarsiortannginnissarlu pingaartinneqassapput.

§ 24. KNR-ip oqaatsit pillugit erseqqissumik anguniagaqarnermigut kalaallit oqaasiisa pigiinnarneqarnissaat ineriartortinneqarnissaallu peqataaffigissavaa.

§ 25. KNR-ip nutaarsiassaqaartitsinermik aallakaatitaasa annertunersaasa naammineerluni aallakaatitassiaanissaat KNR-ip qulakkiissavaa, tak. imm. 2.

Imm. 2. Nammineerluni aallakaatitassiat tassaapput radiukku tv-kkullu aallakaatitassiat aaqqissorneqarsimasut KNR-ip nammineq suliarisimasai aamma aallakaatitassiat aaqqissorneqarsimasut KNR-ip pingaarnertut suliarinnittuulluni aallakaatitassiorartut allat aallakaatitassioqatigalugit suliarisimasai.

Imm. 3. KNR-ip nammineerluni aallakaatitassiaasa saniatigut aallakaatitassiat piniarnerisigut aallakaatitassiorartunillu allanit pisinikkut pissarsiarineqartassapput, tak. § 20, imm. 4. Aallakaatitassiat aamma KNR-ip aallakaatitassiorartullu allat aallakaatitassioqatigiinnerisigut suliarineqarsinnaapput.

§ 26. Innuttaasut aallakaatitsineq pillugu tusarniarneqartarnissaat KNR-ip qulakkiissavaa.

§ 27. Pilerisaarutit aallakaatitassiallu aningaasalersorneqartut kapitali 7-imi maleruagassat malillugit aallakaatitsinermi ilaatinneqarsinnaapput.

§ 28. Naalakkersuisut aamma KNR anguniagassat pillugit isumaqatigiisummik piffissaliussaq Naalakkersuisunit aalajangersarneqartoq nallertinnagu isumaqatigiisuteqartassapput ukiut

sisamakkuutaarlugit atuuttussamik, tak. paragraffit 20-miit 26-mut (innuttaasunik kiffartuussinermut isumaqatigiissut) innuttaasunik kiffartuussinermi pisussaaffit annertussusiinik qanorlu ittuunissaannik erseqqinnerusumik aalajangersaaffiusumik, taamaattorli tak. § 61. Isumaqatigiissutit ikinnerpaamik makkuninnga imaqassapput:

- 1) KNR-ip innuttaasunik kiffartuussinermi ingerlatsinermini aallakaatitsinissamut periarfissaasa qassiuneri pillugit nassuiaatit.
- 2) KNR-ip piffissami isumaqatigiissuteqarfusumi ingerlatsinissamini aningaasaqarnikkut atugassarisaasut naatsorsuutigineqartut pillugit nassuiaatit.
- 3) Nammineerluni aallakaatitassiat ikinnerpaaffissaat nalunaarneqassaaq, tak. § 25, imm. 2.
- 4) Kalaallisut aallakaatitassiat allat ikinnerpaaffissaat nalunaarneqassaaq, tak. imm. 2.
- 5) Aallakaatitassiorartunit allanit pisiarineqartussat ikinnerpaaffissaat nalunaarneqassaaq.
- 6) Aallakaatitassiat nutaarsiassat maannarpiarlu soqutigintartut ikinnerpaaffissaat nalunaarneqassaaq, matumani aamma aallakaatitassiat nutaarsiassat maannarpiarlu soqutigintartut nammineerluni aallakaatitassiat ikinnerpaaffissaat.
- 7) Eqqumiitsuliorneq kulturilu pillugit aallakaatitassiat ikinnerpaaffissaat nalunaarneqassaaq.
- 8) Aallakaatitassiat meeqqanut aammalu inuusuttuaqqanut sammitinneqartut ikinnerpaaffissaat nalunaarneqassaaq.
- 9) Aallakaatitassiat ilinniartitsinermut tunngasut ikinnerpaaffissaat nalunaarneqassaaq.
- 10) Aallakaatitassiat inuiaqatigiinni assigiinngitsunik oqaasilinnut sammitinneqartut aallakaatitanut assigiinngitsunut agguataarsimasut annertussusiat pillugu nassuiaatit, tak. § 20, imm. 9.
- 11) Ingerlatsinermini aningaasartuutit tamarmiusut ilaasa akissarsianut atorineqartussat annerpaaffissaat nalunaarneqassaaq.
- 12) KNR-ip sulisuinik ilinniartitseqqittarnerup ingerlaqqiffiusumillu ilinniartitsinerup qanoq annertutiginnissaannik nassuiaat.
- 13) Allaniq aallakaatitsisarnerup allanillu ingerlataqarnerup imarisaat qanorlu annertutigineri pillugit nassuiaatit, tak. § 29.

Imm. 2. Kalaallisut aallakaatitassianik allaniq oqarnermi pineqarput radiukkut tv-kkullu aallakaatitassiat aqqissorneqarsimasut, Kalaallit Nunaanni tv-qarfinnit radioqarfinnilluunniit allanit imaluunniit suliffeqarfinnit aallakaatitassiorartunit allanit Kalaallit Nunaanni angerlarsimaffeqartunit aallakaatitassiarineqarsimasut.

Imm. 3. Nammineerluni aallakaatitassiat, kalaallisut aallakaatitassiat allat, aallakaatitassiorartunit allanit pisiat ikinnerpaaffissaannik aallakaatitassiallu ataasiakkaat suunissaannik aalajangersaanermi aallakaateqqitat, pilerisaarutit aallakaatitassiallu allat aqqissorneqarsimanngitsut ilaatinneqassanngillat.

Imm. 4. Naalakkersuisut innuttaasunik kiffartuussinermut isumaqatigiissutip imarisai pillugit erseqqinnerusunik malittarisassiorsinnaapput.

Imm. 5. Innuttaasunik kiffartuussinermut isumaqatigiissutip eqquutsinneqarnera pillugu ukiumoortumik nassuiaatit KNR-ip suliaralugillu Naalakkersuisunut aamma Radio tv-lu pillugit ataatsimiititaliamut nassiuatissavai. Nassuiaatit nassiuunneqarsimaffissaa isumaqatigiissummi aalajangerneqartassaaq.

Imm. 6. Innuttaasunik kiffartuussinermut isumaqatigiissut, taassumalu eqquutsinneqarnera pillugu nassuiaat tamanut saqqummiunneqartassapput.

§ 29. KNR allaniq aallakaatitassiorsinnaatitaavoq, assersuutigalugu nunanut allanut aallakaatitsinermi aammalu aallakaatitassiornermi aallakaatitsinertiguinnaanngitsoq siammarterneqartussanik. KNR

aallakaatitassiornermik allamik, kapitali 3 naapertorlugu akuersissut malillugu, ingerlataqarsinnaangilaq. Naalakkersuisut aallakaatitassiorneq alla pillugu maleruagassiorsinnaapput.

Imm. 2. KNR aallakaatitassiornermik ingerlataqarnermut atatillugu imaluunniit ingerlatsiviup teknikkikkut atortuisa atorneqarnissaat, immikkut piginnaasaqarnissaq il.il. siunertaralugit allanik ingerlataqarsinnaavoq. Pisariaqartitsineq naapertorlugu KNR sumiiffinni radioqarfinnik tv-qarfinnillu akiliisitsilluni ilitersuisassaaq.

Imm. 3. Naalakkersuisut ingerlataq alla pillugu maleruagassiorsinnaapput, matumani aamma ingerlatamik allamik suliaqarsinnaanermut killiliussat annertunerulersinneqarnissaat pillugu. Sumiiffinni radioqarfinnik tv-qarfinnillu KNR-ip ilitersuinera pillugu akiliisitsinermi piumasaqaatit pillugit Naalakkersuisut aalajangersaasinnaapput, tak. imm. 2, 2.

Imm. 4. Akiliisitsisarlu tv KNR-ip allanik aallakaatitassiornerani aamma ingerlataani allami ilaasinnaangilaq.

Imm. 5. Allanik aallakaatitassiorneq aamma ingerlataq alla unammilleqatigiinnermi atugassarititaasut tunngavigalugit ingerlanneqassaaq.

KNR-ip aaqqissuussaanera

§ 30. KNR pisortat suliffeqarfigaat namminersortoq.

Imm. 2. KNR-ip suliani aalajangiineri suliffeqarfiup ingerlatsineranut tunngassuteqartut, aqutsinikkut oqartussaasunut allanut ingerlateqqinneqarsinnaangillat. Sulianili tusagassiornermi ileqqorissaarnissaq aammalu akissuteqartarnissaq pillugit KNR-ip aalajangiineri tusagassiuisarnermi akisussaassuseqarneq pillugu inatsimmi maleruagassat naapertorlugit Tusagassiuisarnerit pillugit Aalajangiisartunut ingerlateqqinneqarsinnaapput.

§ 31. KNR siulersuisunit arfineq marlunnik ilaasortalimmit aquneqassaaq, taakkunannga siulersuisut siulittaasuat ilaasortarlu alla ataaseq Naalakkersuisunit toqqarneqartarlutik. Ilaasortat sinneri inassuteqartoqarneratigut Naalakkersuisunit imatut toqqarneqartarput:

- 1) Ilaasortaq ataaseq sumiiffinni radioqarfiit tv-qarfiillu kattuffiannit aallakaatitassioartartullu namminersortut kattuffeqarpata kattuffiannit inassutigineqartarpoq.
- 2) Ilaasortaq ataaseq Tusagassiornermik Ilinniartimmi pisortanit inassutigineqartarpoq.
- 3) Ilaasortaq ataaseq Kalaallit Nunaanni tusarnaartartut isiginnaartartullu nuna tamakkerlugu kattuffiinit inassutigineqartarpoq.
- 4) Ilaasortaq ataaseq Kalaallit Nunaanni eqqumiitsuliortut kulturimillu sammisaqartut kattuffiinit inassutigineqartarpoq.
- 5) Ilaasortaq ataaseq KNR-imi aalajangersimasumik sulisuusunit inassutigineqartarpoq.

Imm. 2. Ilaasortat Kalaallit Nunaanni najugaqartuussapput, 18-inik ukioqalereersimassallutik aammalu Inatsisartuni ilaasortaassanatik.

Imm. 3. Inassuteqarsinnaasunit imm. 1-imi taaneqartunit inassuteqartoqarsimangippat Naalakkersuisut inassuteqarnertaqanngitsumik ilaasortassamik toqqaassapput. Kalaallit Nunaanni tusarnaartartut isiginnaartartullu nuna tamakkerlugu kattuffeqanngippata ilaasortaq ataaseq KANUKOKA-mit inassutigineqassaaq.

Imm. 4. Siulersuisut tamarmiullutik tusagassiorneq, kultureqarneq, pisortatut aqutsineq inuussutissarsiornerlu paasisimasaqarfigissavaat. Ilaasortat peqqussut naapertorlugu inassuteqarnertaqanngitsumik Naalakkersuisunit toqqarneqartussat tamarmik immikkut pisortatut

aqutsineq inuussutissarsiornerlu paasisimasaqarfigissavaat.

Imm. 5. Siulersuisuni ilaasortanut tamanut, siulittaasoq kisiat pinnagu, sinniisussamik toqqaasoqassaaq, taannalu siulersuisunut ilaasortanngussaaq siulersuisunut ilaasortaq pineqartoq tunuarpat, soraarsitaappat sivisuumilluunniit peqanngippat. Sinniisoq toqqarneqarsimasoq siulersuisuni aalajangersimasumik ilaasortanngorpat sinniisussamik nutaamik toqqaasoqassaaq. Siulittaasoq tunuarpat soraarsitaappalluunniit Naalakkersuisut siulittaasumik nutaamik toqqaassapput.

Imm. 6. Siulersuisut akunnerminni siulittaasup tullianik toqqaassapput.

Imm. 7. Ilaasortat ukiuni sisamani atasussatut qinerneqassapput, taamaattorli siullermik piffissamut 1. november 2005-imiit 31. december 2007-imut. Ilaasortat toqqarneqarfigissinnaapput, kisiannili ataasiaannarlutik. Naalakkersuisut siulersuisunut ilaasortaq sinniisussarluunniit aalajangersimasumik ilaasortanngorsimasoq piffissap toqqaaffiup ingerlanerani soraarsissinnaavaat, siulersuisut akisussaaffini annertuumik sumiginnarpagu allatulluunniit siulersuisuni issianissaminut imminut piukkunnarunnaarsissimappat.

Imm. 8. Siulersuisut akissarsiaqarnissaat aamma siulersuisuni ilaasortat akissaajaatiminnut, matumani ilanngullugit KNR-imik sullissinerminni angalanerminnut, nerisaqarnerminnut ineqarnerminnullu taarsiivigineqarnissaat pillugit Naalakkersuisut maleruagassiorsinnaapput.

§ 32. Siulersuisut KNR-ip siulersuisorai qullerpaat, KNR-illu ingerlatsinera pillugu aalajangersakkat malinneqarnissaannut akisussaanerpaajullutik. Siulersuisut taassuma saniatigut akisussaaffigaat KNR-ip ingerlatsinera tamarmiusoq aamma innuttaasunik kiffartuussinermut isumaqatigiissutip eqquutsinneqarnissaa. Siulersuisut ulluinnarni aallakaatitassiorneq aallakaatitassallu ataasiakkaat sunniteqarfigisussaangilaat, tak. § 33, imm. 1.

Imm. 2. Siulersuisut KNR-ip ingerlatsineranut maleruagassat nalinginnaasut aalajangersassavaat.

Imm. 3. Siulersuisut pisortamik atorfinitsitsisartuullutillu soraarsitsisartuupput.

Imm. 4. Naalakkersuisut KNR-imi ileqqoreqqusassat pillugit maleruagassanik aalajangersaasinnaapput.

§ 33. Pisortaq ulluinnarni aallakaatitassanut akisussaavoq aammalu KNR-ip ulluinnarni allaffitsigut aningaasatigullu aqunneqarnera suliassaralugit. Suliffeqarfiup malittarisassat tamatumunnga tunngasut maleruagassallu siulersuisut aalajangersimasaat malillugit aqunneqarnissaa pisortap qulakkiissavaa.

Imm. 2. Pisortaq KNR-imi suleqataasunik atorfinitsitsisartuullunilu soraarsitsisartuuvoq.

§ 34. Atorfinitsitaanerni atugassarititaasut pissutsillu allat, atorfeqarnerup nalaani pissutsit soraarsitaanerillu eqqarsaatigalugit KNR-ip pisussaaffigaa, aalajangersakkat Namminersornerullutik Oqartussani atorfeqartunut qaqugukkulluunniit atuuttut malissallugit.

KNR-ip aningaasalersugaanera

§ 35. KNR-ip ingerlatsinera Nunatta karsianit tapiissutit, pilerisaarutit, aallakaatitassiat aningaasalersorneqartut allatullu ingerlatsisoqarpat tassuunakkut isertitat aqutigalugit aningaasalersorneqarpoq.

Imm. 2. Nunatta karsianit ukiumoortumik tapiissutit, ukiumut aningaasanut inatsiseqarfiup tullianut aningaasanut inatsisissap akuersissutigineqarneranut atatillugu Inatsisartunit aalajangersarneqartarput.

§ 36. Siulersuisut ukiumut aningaasanut inatsiseqarfiup tullianut aningaasatigut missingersuutit Naalakkersuisunut ukiut tamaasa tunniuttassavaat, Naalakkersuisut piffissaliussaata nallertinnagu. Siunnersuutip imarissavai isertitassatut, ingerlatsineranut aningaasartuutissatut sanaartornermullu aningaasartuutissatut naatsorsuutigisat missingersornerat kiisalu ukiut nikinneranni aningaasaatit

akiitsullu. Tamatuma peqatigisaanik ukiumi aningaasanut inatsiseqarfimmi taaneqartumi Nunatta karsiata tapiissutissaasa qanoq amerlatiginissaannik siunnersuut siulersuisut tunniuttassavaat.

Imm. 2. Siulersuisut missingersuutininut tamarmiusunut siunnersuummut ilanngullugu aallakaatitassiornermik allamik ingerlatsinissamut imaluunniit allamik ingerlatsinissamut immikkut missingersuutininut, matumani aamma ingerlatanut assigiinngitsunut allanut ataasiakkaanut immikkut missingersuutininut siunnersuutininik tunniussaqaartassapput.

§ 37. KNR-ip ukioq naatsorsuusiorfia tassaavoq ukioq aningaasanut inatsiseqarfik. Namminersornerullutik Oqartussani aningaasatigut missingersuusiornermut, naatsorsuutininik nalunaarsuinermut naatsorsuutininillu saqqummiussiarnermut malittarisassat qaqugukkulluunniit atuuttut KNR-ip malissavai.

Imm. 2. Naatsorsuutini KNR-ip pisortat sullissinerannik ingerlatsineranut, aallakaatitassiornermik allamik ingerlatsinermut imaluunniit allamik ingerlatsinermut naatsorsuutai immikkut naatsorsuusiorneqarsimassapput, matumani aamma allamik ingerlatsineranut assigiinngitsunut tamanut immikkut naatsorsuutit.

Imm. 3. Naalakkersuisut innuttaasunik kiffartuussinermi ingerlatsinerup aallakaatitassiornermillu allamik ingerlatsinerup aamma allamik ingerlatsinerup missingersuutitigut naatsorsuutitigullu immikkoortinneqarnissaat pillugu maleruagassanik aalajangersaasinnaapput.

Imm. 4. Ukiumoortumik naatsorsuutit Namminersornerullutik Oqartussat kukkunersuiuisunit kukkunersiorneqartassapput.

Imm. 5. Piffissaliussaq Naalakkersuisunit aalajangerneqartoq tikitsinnagu, ukiumoortumik naatsorsuutit kukkunersiorneqarsimasut siulersuisunit akuerineqarsimasut, kukkunersuiuisut oqaaseqaataannik ilaqartillugit siulersuisunit Naalakkersuisunut akuersissutigisassat saqqummiunneqartassapput. Naalakkersuisut ukiumoortumik naatsorsuutit tamatuma kingorna Inatsisartunut ilisimatitsissutitut ingerlateqqissavaat.

Imm. 6. Siulersuisut naatsorsuutininik Naalakkersuisunut saqqummiussinertik ilutigalugu naatsorsuutit tamanut saqqummiutissavaat.

Kapitali 5

Sumiiffinni radioqarfinnut tv-qarfinnullu tapiissutit

§ 38. Naalakkersuisut tunngaviumik tapiissutinik tapiiffigineqarnissamik qinnuteqaateqartoqartillugu aningaasanut inatsimmi tassunga aningaasaliissutigineqarsimasut periarfissiinerat malillugu sumiiffinni radioqarfinnut tv-qarfinnullu piumasaqaatinik makkuninnga naammassinnittunut tunngaviumik tapiissuteqartassapput:

- 1) Aallakaatitsivik aallakaatitsisinnaanermut akuersissummik atuuttumik peqassaaq.
- 2) Aallakaatitsiviup missingersuutit, naatsorsuutit kukkunersuiisoqarnerlu pillugit Namminersornerullutik Oqartussat maleruagassiaat eqquutsissavai.
- 3) Aallakaatitsiviup aallakaatitassiornermik ingerlatsinermut uppenarsaatit pillugit Namminersornerullutik Oqartussat maleruagassiaat eqquutsissavai.
- 4) Aallakaatitsiviup sumiiffimmi innuttaasut sumiiffimmi nutaarsiassanik ilisimatittassavai.
- 5) Aallakaatitsiviup sumiiffimmi innuttaasut oqaaseqarnissamut periarfissaqartissavai.
- 6) Aallakaatitsiviup aallakaatitassiornermik ingerlatsinermini ilaatigut aallakaatissavai siammartissallugilluunniit aallakaatitassiat aqqissorneqarsimasut, aallakaatitsiviup nammineerluni suliai imaluunniit aallakaatitsiviup aallakaatitassiornermik ingerlatsivimmik allamik suleqateqarluni

pingaarnertut aallakaatitassiortuulluni suliai (nammineerluni aallakaatitassiat). Aallakaatitseqqinnerit, ussassaarutit aallakaatitassiallu aaqqissuunneqarsimangitsut nammineerluni aallakaatitassiatut isigineqanngillat.

7) Aallakaatitsiviup aallakaatitassianik meeqqat ukiukinnerit timikkut, tarnikkut ileqqulersornikkulluunniit annertuumik ajoquserneqaatigisinnaasaannik, matumani pingaartumik aallakaatitassianik atoqatigiinnermut tunngasunik imaluunniit pissuteqanngivilluni nukissornermik imaqtartunik aallakaatitsisoqannginnissaa qulakkiissavaa. Ilanngutassiat sakkortuumik nukissornermik imaqtartut imaluunniit isiginnaagassat kanngunartut pillugit aallakaatitsivik tusarnaartartunut isiginnaartartunullu mianersoqqusisassaaq.

8) Aallakaatitsiviup aallakaatitassianik ammip qalipaataanik, arnaanermik/angutaanermik, upperisamik, sumit naggueqarnermik, nunamit suminngaanneermermik anguteqammilluunniit/arnaqammilluunniit atoqateqartartuuneramik pissuteqartumik qinngarsuilernissamat, politikikkut isummanik aqutissiuqataasinnaasunik aallakaatitsisoqannginnissaa qulakkiissavaa.

Imm. 2. Piumasaqaatit imm. 1, nr. 4-miit 6-imut taaneqartut qanoq annertutiginissaasa ikinnerpaaffissaat pillugit maleruagassat Naalakkersuisunit aalajangersarneqarsinnaapput.

Imm. 3. Tapiissutit qaammatit pingasukkuutaartumik siumoortumik tunniunneqartassapput.

Imm. 4. Tapiissutininik pissarsisup aallakaatitassiornermik ingerlatsinermi allannguutit, imm. 1-imi piumasaqaatinik naammassinnikkunnaarnermik kinguneqartut Naalakkersuisunut nalunaarutigisussaavai.

Imm. 5. Tapiissutininik pissarsisup aallakaatitsinermik ingerlataqarnini, piffissaliussaq Naalakkersuisunit aalajangerneqartoq nallertinnagu ukiumoortumik naatsorsuutitigut kiisalu ukiumoortumik nalunaarutikkut nassuiaatigisassavaa.

§ 39. Naalakkersuisut aallakaatitassiornissamat tapiissutininik tapiiffigineqarnissamik qinnuteqaateqartoqartillugu aningaasanut inatsimmi tassunga aningaasaliissutigineqarsimasut periarfissiinerat malillugu sumiiffinni radioqarfinnut tv-qarfinnullu, tunngaviusumik tapiissutininik tapiiffigineqarnissamik piumasaqaatinik aamma nammineerluni aallakaatitassiat aalajangersimasut ikinnerpaaffissaannik piumasaqaatit Naalakkersuisut aalajangersimasaannik naammassinnittunut taamatut tapiissuteqartassapput, tak. imm. 2.

Imm. 2. Nammineerluni aallakaatitassiat qanoq ittut aallakaatitassiornermut tapiissutininik tapiiffigineqarsinnaanerit pillugu maleruagassat Naalakkersuisut aalajangersassavaat, aammalu aallakaatitassiornermut tapiissutit, matumani aamma tapiissutit annertussusiinik ataasiakkaanik pisinnaanermit piumasaqaatit pillugit maleruagassat aalajangersarsinnaallugit.

Imm. 3. Aallakaatitassiornermut tapiissutit qaammatit pingasukkuutaartumik tunniunneqassapput qinnuteqaateqartup qaammatit pingasukkuutaap taassuma siuliani nammineerluni aallakaatitassiarisimasaasa annertussusii tunngavigalugit. Aallakaateqqitat, pilerisaarutit aallakaatitallu allat aaqqissorneqanngitsut nammineerluni aallakaatitassiat naatsorsorneqarneranni ilaassanngillat.

Imm. 4. Tapiissutininik pissarsisup nammineerluni aallakaatitassiornermik ingerlataqarnini, piffissaliussaq Naalakkersuisunit aalajangerneqartoq nallertinnagu ukiumoortumik naatsorsuutitigut ukiumoortumillu nalunaarutikkut nassuiaatigisassavaa.

§ 40. Naalakkersuisut aningaasanut inatsimmi tassunga aningaasaliissutigineqarsimasut periarfissiinerat malillugu sumiiffinni radioqarfuit tv-qarfillu kattuffiannut, kattuffiup ingerlanneqarneranut tapiissutininik kiisalu aningaasanut inatsimmi tassunga aningaasaliissutigineqarsimasut periarfissiinerat malillugu

sumiiffinni radioqarfiit tv-qarfillu sulisuisa ilinniarteqqinneqartarnerannik ingerlaqqiffusumillu ilinniartinneqarnerannik ineriartortitsineranut tapiissuteqartassapput.

§ 41. Tunngaviusumik tapiissutit tamakkiisumik ilaannakuusumilluunniit utertinneqarnissaat piumasarineqarsinnaavoq, tapiissutinik pissarsisoq

- 1) tunngaviusumik tapiissutinik tapiiffigineqarnissamik qinnuteqaateqarnermini eqqunngitsunik paasissutissiisimappat,
- 2) aallakaatitassiornermik ingerlataqarnermi annertuumik allannguutit nalunaarutigisimangippagit, tak. 38, imm. 4,
- 3) aallakaatitassiornermik ingerlataqarnini pillugu nassuiaammik piffissaliussatut aalajangersarneqartup iluani tunniussaqaarsimangippat, tak. 38, imm. 5, imaluunniit
- 4) aallakaatitsisinaanermut akuersisummik tunineqarnissamut piumasaqaatinik naammassinnikkunnaarsimappat, tak. § 13.

Imm. 2. Aallakaatitassiornermut tapiissutit tamakkiisumik ilaannakuusumilluunniit utertinneqarnissaat piumasarineqarsinnaavoq, tapiissutinik pissarsisoq

- 1) aallakaatitassiornermut tapiissutinik tapiiffigineqarnissamik qinnuteqaateqarnermini eqqunngitsunik paasissutissiisimappat,
- 2) nammineerluni aallakaatitassiornermik pillugu nassuiaammik piffissaliussatut aalajangersarneqartup iluani tunniussaqaarsimangippat, tak. 39, imm. 4, imaluunniit
- 3) aallakaatitsisinaanermut akuersisummik tunineqarnissamut piumasaqaatinik naammassinnikkunnaarsimappat, tak. § 13.

Imm. 3. Tunngaviusumik tapiissutit, aallakaatitassiornermut tapiissutit aamma sumiiffinni radioqarfiit tv-qarfillu kattuffiata ingerlanneqarneranut tapiissutit kiisalu ilinniartitseqqinnermut ingerlaqqiffusumillu ilinniartitsineranut tapiissutit tamakkiisumik ilaannakuusumilluunniit utertinneqarnissaat piumasarineqarsinnaavoq, tapiissutinik pissarsisup tapiissutit aningaasaliissutigineqarneranni siunertaannit allaanerusunut atorsimappagit.

§ 42. Naalakkersuisut tunngaviusumik aamma aallakaatitassiornermut tapiissutit kiisalu tapiissutit § 40-mi taaneqartut, matumani ilanngullugit qinnuteqaat, naatsorsuutit utertitsinissarlugu pillugit erseqqinnerusunik maleruagassiorsinnaapput.

Imm. 2. Naalakkersuisut isumagisassanngortitsinerminni radio tv-lu pillugit aalajangiisartut kattuffilluunniit sumiiffinni radioqarfiit tv-qarfillu sinniisigisaat tamakkiisumik ilaannakuusumilluunniit peqqusinnaavaat, tunngaviusumik aamma aallakaatitassiornermut tapiissutit kiisalu ilinniartitseqqinnermut ingerlaqqiffusumillu ilinniartitsineranut tapiissutit pillugit maleruagassanik isumagineqqullugit. Naalakkersuisut tapiissutit isumagineqarnerat pillugu isumaginnittussatut piginnaatitsineranut maleruagassanik aalajangersaasinnaapput.

Imm. 3. Aningaasat tunngaviusumik aamma aallakaatitassiornermut tapiissutit atunngitsoorneqartut ilinniartitseqqinnermut ingerlaqqiffusumillu ilinniartitsineranut tapiissutit Naalakkersuisunit atornerqarsinnaapput, tak. § 40, imm. 1. Tapiissutinik allaffissornikkut aqutsineq allamut isumagisassanngortinneqarsimappat, taamatut piginnaatinneqartup tunngaviusumik aamma aallakaatitassiornermut tapiissutit atunngitsoorneqartut ilinniartitseqqinnermut ingerlaqqiffusumillu ilinniartitsineranut tapiissutit atorsinnaavai.

Kapitali 6

Radio tv-lu pillugit aalajangiisartut

§ 43. Naalakkersuisut aalajangiisartut, Radio tv-lu pillugit aalajangiisartut radiumi tv-milu suliassanik arlalinnik samminnittuusussaq pilersissavaat, tak. paragraffit 44-miit 46-mut. Aalajangiisartut ukiuni sisamani atasussatut pilersinneqassaaq, siullermik piffissamut 1. januar 2005-imiit 31. december 2008-mut.

Imm. 2. Aalajangiisartut pingasunik ilaasortaqaassaaq, taakkualu tamarmiullutik ingerlatsinermut, inuussutissarsiornermut, tusagassiornermut kulturimullu tunngasunik ilisimasaqassapput. Ilaasortat Kalaallit Nunaanni najugaqartuussapput, Inatsisartuni ilaasortaassanatik, KNR-ip, Sinerissami Takusassiiviit Tusagassiiviillu Kattuffiata (STTK) STTK-lluunniit ilaasortaasa arlaanni siulersuisuini ilaasortaassanatik taakkunaniluunniit sulisuussanatik.

Imm. 3. Suleqatigisat attuumassuteqartut ilaasortassatut siunnersuutissaannik piniareerlutik Naalakkersuisut aalajangiisartut ilaasortassaanik toqqaasassapput. Naalakkersuisut aalajangiisartut siulittaasua toqqaasavaat.

Imm. 4. Naalakkersuisut aalajangiisartut oqaaseqartereerunikkut aalajangiisartut suleriaasissaa pillugu maleruagassat aalajangersassavaat.

Imm. 5. Naalakkersuisut aalajangiisartut allattoqarnissaa isumagissavaat.

Imm. 6. Aalajangiisartut ingerlatani pillugit ukiumoortumik nalunaarusiamik Naalakkersuisunut tunniussaqaartassaaq.

§ 44. Radio tv-lu pillugit aalajangiisartut suliassai pingaarnerit makkuupput:

- 1) Sumiiffimmi aallakaatitsisinnanermut akuersissutinik tunniussisarneq.
- 2) Sumiiffimmi aallakaatitsisinnanermut akuersissutinik atorunnaarsitsisarneq aamma nuna tamakkerlugu aallakaatitsisinnanermut akuersissutinik atorunnaarsitsinissaq pillugu Naalakkersuisunut inassuteqartarneq.
- 3) KNR-ip innuttaasunik kiffartuussinermut isumaqatiissutip eqquutsinneqarneranik ukiumoortumik nassuiaataanik misissuataarisarnissaq, Naalakkersuisunullu tamanna pillugu oqaaseqaasiornissaq.
- 4) Suliassat pilersaarutinut aallakaatitallu aningaasalersorneqarnerannut tunngasut aalajangiiffigisarnerat il.il., tak. § 46.
- 5) KNR-ip aamma radioqarfiit tv-qarfiillu allat, radiukkut tv-kkullu aallakaatitsisarneq pillugu maleruagassanik malinninnissaannik nakkutilliinissaq, tassunga ilanngullugit Inatsisartut peqqussutaannik, inatsisartut peqqussutaat naapertorlugu aalajangersakkanik akuersissuteqarnissamullu piumasqaatinik unioqqutitsisoqartillugu assuarliutit.
- 6) Radio tv-lu pillugit apeqqutini Naalakkersuisut siunnersortassallugit.

Imm. 2. Radio tv-lu pillugit aalajangiisartut isumagissavaa attuumassuteqanngitsut avataaneersut tusarnaartartunut isiginnaartartunullu tunngatillugu makkuninnga misissuisinneqartarnissaat

- 1) radiukkut tv-kkullu aallakaatitsineq pillugu kissaatit aamma
- 2) nuna tamakkerlugu aamma sumiiffinni radioqarfiit tv-qarfiillu aallakaatittagaannik aammalu radiukkut tv-kkullu neqeroorutinik allanik atuineq.

Imm. 3. Naalakkersuisut Radio tv-lu pillugit aalajangiisartut allanik suliakkersorsinnaavaat.

§ 45. Radio tv-lu pillugit aalajangiisartut aalajangiiffigisassavai sumiiffinni aallakaatitsisinnanermut akuersissutinik tunniussinissaq atuukkunnaarsitsinissarlu.

§ 46. Pilerisaarutitut aallakaatitassianullu aningaasalersorneqartunut tunngatillugu Radio tv-lu pillugit aalajangiisartut suliasai makkuupput:

1) Paragraffit 50-imiit 55-imut aamma § 53 naapertorlugi

2) § 52 naapertorlugi radiukkut tv-kkullu pilerisaarutit imarisassa at aalajangiisartut aalajangiiffigisassavai.

Aalajangiisartut maleruagassat unioqqutinneqarnerat assuarliutigisinnaavai aammalu KNR aamma aallakaatitsisarnissamut akuersissuteqartoq peqqusinnaallugit aalajangiinerup tamanut saqqummiunneqarnissaanik. Aalajangiisartut aalajangiiffigisinnaavaa tamanna qanoq iliornikkut qanorlu iluseqarluni pinissaa.

3) Paasissutissat immikkut illuinnartut pilerisaarutitigut aallakaatinneqartut pillugit aalajangiisartut akissuteqarnissamut aalajangiissaaq. Akissuteqarnissamut piumasaqaataavoq, paasissutissat aningaasaqarnikkut imaluunniit allatigut pingaaruteqartumik ajoqusiinissamut peqqusissutaasinnaanerat, ilumuussusiisalu nalorninaatsuunissaat. Aalajangiisartut KNR aamma aallakaatitsisarnissamut akuersissuteqartoq akissuteqarnissamut peqqusinnaavai. Aalajangiisartut aalajangiiffigisinnaavai akissuteqarnissap imarisassaa, ilusissaa inissinneqarnissaalu.

4) Paragraffit 54 aamma 55 naapertorlugit aningaasaliisut aallakaatitassianillu aningaasaliisut suussusersineqarnissaat aalajangiisartut aalajangiiffigisassavai.

§ 47. Radio tv-lu pillugit aalajangiisartut aalajangiineri pisortaqarfinnut allanut ingerlateqqinneqarsinnaanngillat.

§ 48. Radio tv-lu pillugit aalajangiisartut suliasaminik isumaginninnissamini KNR aamma aallakaatitsisinnaanermut akuersissummik piginnittoq suliffeqarfup ingerlanneqarnera pillugu paasissutissanik piumasaqarfisinnaavaa.

§ 49. Radio tv-lu pillugit aalajangiisartut ingerlatsinera Naalakkersuisut malittarisassiuussinnaavaat, tassunga ilanngullugit aalajangiisartut suliasai, ilusissaa ukiumullu nalunaarusiami missingersuutit naatsorsuutillu imarisassaat.

Kapitali 7

Pilerisaarutit aallakaatitanillu aningaasalersuisarneq

§ 50. Radiumi tv-milu pilerisaarutit imatut paasineqassapput:

1) Nioqqutissanut, kiffartuussinernut suliffeqarfillu iluanaarniarnissamik siunertaqartut kaammattuutit nersorinninnerillu, qanorluunniit aallakaatitassiamut akiliuteqartoqarsimagaluarpat.

2) Aningaasarsiornikkut soqutigisaqaqatigiit pillugit ilisimatitsissutit isummanillu saqqummiussinerit, assersuutigalugu inuussutissarsiuteqartut kattuffii, sulisitsisut kattuffii sulisartullu peqatigiiffii pillugit aammalu upperisarsiornikkut paasissutissiinerit politikkikkulluunniit isummiussat, peqatigiit taakkua isumaasa siuarsarneqarnissaat kaammattuutigineqarnissaallu siunertaralugit, qanorluunniit aallakaatitassiamut akiliuteqartoqarsimagaluarpat.

Imm. 2. Pilerisaarutit ilumut taamaattuunerat uppersarsarneqarsinnaasariaqarpoq, taamaalilluni imarisaat saqqummiunneqariaasiallu aallakaatitanit nalinginnaasunit allaanerulluni.

§ 51. Tv-kkut, tekst-tv kisiat pinnagu, pilerisaarutit sivisunerpaamik minutsinik tallimanik sivisussusilikkuutaamik taamaallaat aallakaatinneqarsinnaapput. Reklamit taakku aallakaatitanut akunniliullugit inissinneqassapput.

Imm. 2. Radiukkut pilerisaarutit KNR-imi taamaallaat sivisunerpaamik minutsinik tallimanik sivisussusilikkuutaamik aallakaatinneqarsinnaapput, aallakaatitanullu akunniliussatut inissinneqassallutik.

Imm. 3. Pilerisaarutitik aallakaatitsinerit piffissap ullormut aallakaatitsiviusup 10 procentiinit sivilunerussanngillat.

§ 52. Nakorsaait, tupat, immiaaqqat, viinnit imigassallu kimittuut pilerisaarutitut ilanngunneqaqqusaanngillat, taamaattorli tak. imm. 3.

Imm. 2. Aamma upperisarsiornermik suliaqartut aamma politikkikkut partiit, kattusseqatigiit, kattuffiit kisimiillutillu qinigassanngortittut tv-kkut pilerisaarutitut ilanngunneqaqqusaanngillat, taamaattorli tak. imm. 3.

Imm. 3. Naalakkersuisut imm. 1-imi 2-milu inerteqqutit avaqqunneqarsinnaaneri pillugit maleruagassiorsinnaapput.

§ 53. Pilerisaarutit aallakaatitassiornermi qanoq ittumik ilanngunneqartarnissaat Naalakkersuisut malittarisassiuussinnaavaat, matumani ilanngullugit pilerisaarutit suunerannik uppernarsaanermut, inissisimanerannut, oqaasiinut imarisaannullu aammalu qanoq annertussuseqarnissaannut maleruagassat. Tamatumunga atatillugu pilerisaarutit meeqqanut sammitinneqartut inissinneqarnissaannut aamma nioqqutissat meeqqanut tunngasut pillugit pilerisaarutitut tunngasut Naalakkersuisut malittarisassiuussinnaavaat.

§ 54. Aallakaatitassianut aningaasalersuisarnermut ilaapput inuup ingerlatsiviulluunniit radiukkut tv-kkulluunniit aallakaatitassianik, filminik il.il. aallakaatitsinermik aallakaatitassiornermilluunniit ingerlataqartuunngitsup, atermi, ilisarnaatimi (logo), kinaassutsimi, ingerlatami nioqqutissiamiluunniit ilisimaneqarnerulernissaa siunertaralugu radiukkut tv-kkulluunniit aallakaatitassiat, matumani aamma tekst-tv-mi takutitat toqqaannartumik toqqaannanngitsumilluunniit aningaasalersorneqarnerannut tapiissutai suulluunniit.

Imm. 2. Aallakaatitap aningaasalersugaanera aallakaatitap aallartinnerani, naanerani aallakaatitalluunniit nalinginnaasumik unillatsiarfiini imaluunniit taaneqartut arlaanni arlalinni tapiissuteqartup aqqata ilisarnaataaluunniit (logo) nalunaarneqarneratigut ilisarnarsisinneqarsinnaasariaqarpoq. Tamakkuali aallakaatitami imminerimi nalunaarneqassanngillat. Taamaattorli tekst-tv-mi takutitani ataasiakkaani, imm. 1 naapertorlugu tapiiffiqineqartuni tapiissuteqartup aqqa ilisarnaataaluunniit (logo) nalunaarneqassapput.

Imm. 3. Aallakaatitap aningaasalersorneqartup imarisaa qanorlu saqqummiunneqarnera tapiissuteqartumit imatut sunniuteqarfigineqassanngilaq, radioqarfiup tv-qarfulluunniit aallakaatitanut tunngatillugu aqqissuussinikkut nammineersinnaaneranut malunniutissalluni.

Imm. 4. Aallakaatitassiat inuup ingerlatsiviulluunniit immiaaqqanik, viinninik imigassanillu kimittuunik, tupanit nioqqutissianik nioqqutissanilluunniit pujortarnermut atatillugu atorneqarnerusartunik aammalu nakorsaatinik tunisassiornissamik tuniniaanissamillu pingaarnertut ingerlataqartup aningaasalersugai aallakaatinneqaqqusaanngillat, taamaattorli tak. imm 8.

Imm. 5. Aallakaatitassiat upperisarsiornermik suliaqartunit aamma politikkikkut partiinit, kattuffinnit kisimiillutillu qinigassanngortittunit aningaasalersorneqartut aallakaatinneqaqqusaanngillat, taamaattorli tak. imm. 7 aamma 8.

Imm. 6. Aallakaatitassiat nutaarsiasanik maannarpiarlu soqutiginarutunik imallit aningaasalersorneqartut aallakaatinneqaqqusaanngillat.

Imm. 7. Radioqarfiit tv-qarfillu tapiissutinik pissarsineq ajortut imm. 5-imi pineqanngillat.

Imm. 8. Naalakkersuisut imm. 4-mi 5-imilu inerteqqutit avaqqunneqarsinnaaneri pillugit maleruagassiorsinnaapput.

§ 55. Aningaasalersuisarnerit aallakaatitassiornermik ingerlatsinermi qanoq ittumik ilanngunneqarsinnaanerannut maleruagassat erseqqinnerusut Naalakkersuisunit aalajangersarneqarsinnaapput.

§ 56. Pilerisaarutit ilanngunneqartut aallakaatitassiallu aningaasaliiffigineqartut pillugit naammagittaalliuutit, tak. § 46, ilanngunneqartup aallakaatinneqartulluunniit aallakaatinneqareerneratigut sapaatip akunneri sisamat qaangiutsinnagit Radio tv-lu pillugit ataatsimiititaliamit tiguneqareersimassapput.

Imm. 2. Radio tv-lu pillugit aalajangiisartut suliaassanik nammineerluni suliaassanngortitsinissani aalajangersinnaavaa.

Imm. 3. Naalakkersuisut pilerisaarutit aallakaatitanillu aningaasalersuisarneq pillugit sulianik naammagittaalliuuteqartarneq pillugu maleruagassanik aalajangersaasinnaapput.

Kapitali 8

Misileraanerit aamma pineqaatissiinerit

§ 57. Misileraanerit Inatsisartut peqqussutaanni aalajangersakkat periarfissiinerat naapertorlugu ingerlanneqarnissaat Naalakkersuisut akuersissutigisinnaavaat.

§ 58. Dekoderinik imaluunniit dekoderinut atortunik allanik, radiukkut tv-kkulluunniit aallakaatitap ilisarnarunnaarsarneqarsimasup (kodet) imarisaanik pisortanit akuerisaanngitsumik pissarsinissamut atugassanik sananissaq, eqqussuinissaq, tuniniaanissaq, ikkussinissaq, peqarnissaq allanngortitsinissarlunniit inerteqqutaapput. Atortut tamakkua takoqqusaarutiginnissaat allatulluunniit pilerisaarutini ilanngunneqarnissaat inerteqqutaavoq.

§ 59. Akiliisinneqarsinnaavoq

- 1) § 1-imut akerliusumik tusarnaagassanik isiginnaagassanillu aallakaatitassiortoq,
- 2) tusarnaagassanik isiginnaagassanillu § 4, imm. 1-imut imaluunniit § 4, imm. 2 aamma 3 malillugit piunasaqaatinut akerliusunik, aallakaatitsissutit digitaliusut aqqutigalugit siammarterisoq,
- 3) tusarnaagassanik isiginnaagassanillu paragraffinut 5-imiit 7-imut akerliusumik antenneqarfiit ataatsimoorussat atorlugit siammarterisoq,
- 4) aningaasaliissutigineqartunit allaanerumsumik siunertanut allanut tapiissutinik atuisoq,
- 5) § 46, imm. 1, nr. 1 malillugu aalajangikkamik sumiginnaasoq,
- 6) naqqiissuteqarnissamik aalajangiinermik sumiginnaasoq, tak. § 46, imm. 1, nr. 2, imaluunniit
- 7) § 6-imik, § 7, imm. 1-imik 2-millu, paragraffinik 15-imiit 18-imut, paragraffinik 50-imiit 51-imut, § 52, imm. 1-imiit 2-mut, § 48, § 54, imm. 2-miit 6-imut, § 58-imik imaluunniit § 17 naapertorlugu peqqussummik unioqqutitsisoq.

Imm. 2. § 8-mi, § 12-imi, imm. 4-mi, § 16-imi, imm. 2-mi, 38, imm. 2-mi, § 39, imm. 2-mi, § 42, imm. 1-imi, § 53-imi aamma § 55-imi inassutinik unioqqutitsinerit akiliisussanngortitsissutaasinnaapput.

Imm. 3. Aktietigut ingerlatseqatigiiffiit, piginneqatigiilluni ingerlatseqatigiiffiit, peqatigiiffiit assigisaalluunniit pillaammik akiliisussanngortinneqarsinnaapput. Kommuni kommunilluunniit suleqatigiiffiat il.il. pillaammik akiliisussanngortinneqarsinnaapput.

Kapitali 9

Atuutilersitsissutaasumik, ikaarsaarutaasumik atuukkunnaarsitsissutaasumillu aalajangersakkat

§ 60. Inatsisartut peqqussutaat ulloq 1. januar 2005-imiit atuutilissaaq. Tassunga ilutigitillugu Radiukkut fjernsynikkullu aallakaatitsisarneq pillugu Inatsisartut peqqussutaat nr. 3, 17. maj 1990-imeersaq atuukkunnaarsineqassaaq, taamaattorli tak. imm. 3.

Imm. 2. Malittarisassat radiukkut fjernsynikkullu aallakaatitsisarneq pillugu Inatsisartut peqqussutaat nr. 3, 17. maj 1990-imeersaq naapertorlugu aalajangersarneqartut atuutiinnassapput, Inatsisartut peqqussutaani matumani allaniluunniit tunngavissaqarluni maleruagassat aalajangersarneqartut allamik taarserneqarnissaasa imaluunniit atuukkunnaarsineqarnissaasa tungaannut.

Imm. 3. Radiukkut fjernsynikkullu aallakaatitsisarneq pillugu Namminersornerullutik Oqartussat nalunaarutaat nr. 34, 26. november 1991-imeersaq maleruagassallu tassunga aalajangersakkat naapertorlugit sumiiffinni radioqarfinnut tv-qarfinnullu, Radiukkut fjernsynikkullu aallakaatitsisarneq pillugu Inatsisartut peqqussutaat nr. 3, 17. maj 1990-imeersaq naapertorlugu akuersissuteqarfingeqartunut atuuppoq, taakkua Inatsisartut peqqussutaat manna naapertorlugu aallakaatitsisarnissamut akuersissuteqarfingeqarnissamik tungaannut. Suliassat Radio tv-lu pillugit naammagittaalliuuteqartarfimmuut isumagisassanngortinneqarsimasut januarip aallaqqaataanit 2005-imiit Radio tv-lu pillugit ataatsimiititaliamit isumagineqalissapput, taamaattorli tak. § 64.

§ 61. Naalakkersuisut KNR-illu anguniagassat pillugit isumaqatigiissutissaat, tak. § 28, siullerpaameerluni isumaqatigiissutigineqassaaq piffissamut 1. januar 2006-imiit 31. december 2008-imut, taavalu kingorna 1. januar 2009 aallarnerfigalugu ukiut sisamakkuutaartumik.

§ 62. Radiukkut fjernsynikkullu aallakaatitsisarneq pillugu Inatsisartut peqqussutaanni nr. 3-mi, 17. maj 1990-imeersumi maleruagassat naapertorlugit siulersuisut toqqarneqartut, 1. november 2005-imi nutaamik siulersuisussanik toqqaanissap tungaanut atuutissapput.

§ 63. Akuersissutit radiukkut fjernsynikkullu aallakaatitsisarneq pillugu Namminersornerullutik Oqartussat nalunaarutaat nr. 34, 26. november 1991-imeersaq naapertorlugu sumiiffinni radioqarfinnut tv-qarfinnullu tunniunneqarsimasut ulloq akuersissutip atorunnaarfissaatut aalajangerneqarsimasoq tikillugu atuutissapput, taamaattorli tak. imm. 2.

Imm. 2. Inatsisartut peqqussutaanni matumani kapitali 5 naapertorlugu tapiissutit tunniunneqarnissaannut piunasaqaataavoq, qinnuteqartup aallakaatitsisinnanermut akuersissummik kapitali 5-imi maleruagassat malillugit tunineqarsimanissaa.

§ 64. Naammagittaalliuutit 1. januar 2005 nallertinnagu Radio tv-lu pillugit naammagittaalliuuteqartarfimmuut anngunneqartut, Radio tv-lu pillugit naammagittaalliuuteqartarfimmit inaarneqassapput Radiukkut fjernsynikkullu aallakaatitsisarneq pillugu Inatsisartut peqqussutaat nr. 3, 17. maj 1990-imeersaq peqqussullu taanna naapertorlugu maleruagassat aalajangersarneqartut naapertorlugit inaarlugit naammassineqassapput.

§ 65. Inatsisartut peqqussutaat radiukkut tv-kkullu ingerlatsinernut danskit amerikamiullu sakkutooqarfiini (Pituffik), Kalaallit Nunaata illersorneqarnissaa pillugu 27. april 1951-imi isumaqatigiissut naapertorlugu pilersinneqarsimasuni amerikamiunit ingerlanneqartunut atuutinngilaq.

Hans Enoksen

/

Henriette Rasmussen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut